

MDG sitt høyringssvar til regjeringa vedrørande vindkraftutbygging

Miljøpartiet Dei Grøne i Kvinnherad registrerer med uro at NVE vurderer Kvinnheradsfjella som aktuelle for vindkraftutbygging. Vi vil på det sterkaste råda frå dette. Som miljø- og klimabevisste innbyggjarar, er vi sjølvstøtte i utgangspunktet positive til fornybar energi. Men slik vi ser det, er den planlagde vindkraftutbygginga så skadeleg for naturen at kostnaden vert for stor.

- Kvinnherad er ein av landets største kraftkommunar, og det har vore kraftutbyggingar i kommunen i fleire generasjonar som har lagt beslag på store naturområde. I tillegg ligg mesteparten av Folgefonna nasjonalpark i Kvinnherad med Noregs tredje største isbre som hovudattraksjon. Det er også oppretta fleire landskapsvernområde i kommunen. I lys av dette synest MDG Kvinnherad det blir heilt feil å byggja vindmøller på Folgefonnhalvøya, og gjennom dette øydeleggja endå meir særprega og vakker natur.
- Vi pliktar å gje fugl, dyreliv og insekt dei beste levekåra i ei tid der fleire og fleire artar vert utryddingstrua. I Kvinnheradsfjella fins t.d. habitat for hubro (markert som sterkt trua på røddlista til artsdatabanken) og vi vil ha dei her i framtida også.
- Vi er forundra over at andre energikjelder ikkje blir vurdert før landvind. Kva med solcelleteknologi, hydrogen eller bølgekraft? Kva med havvind? I ei tid der andre land legg ned landvindproduksjonen sin og flyttar vindmøllene ut på havet, verkar det lite framtidsretta å rasera den verdifulle naturen i Noreg for å byggja vindmøller i fjellheimen.
- Vi meiner det bør fokuserast langt meir på energisparing, t.d. i forskrifter for byggjebansjen og i skatteinsentiv for privatpersonar. Det ligg også eit stort potensiale i å oppgradera og utvida allereie eksisterande kraftverk.
- Kvinnherad har bidrege med vasskraft i meir enn 100 år, og det blir for tida arbeid med å få etablert ein storskala hydrogenproduksjon i tilknytning til eksisterande vasskraftressursar i kommunen (samarbeid mellom Gasnor, Kvinnherad Energi, Kvinnherad kommune og Sunnhordland Kraftlag). Vi ber om at resten av naturen får vera i fred – til glede for folk flest og som verdiskapning for lokalsamfunnet gjennom turisme.

Denne teksten vart posta på regjeringa sine nettsider som høyringssvar frå oss i MDG. Vi oppmodar alle andre om å senda inn høyringssvar innan 1.10.

*Eli Hårklau,
MDG Kvinnherad*